

RM100 JUTA DIMANFAATKAN PERKASA PENDIDIKAN ORANG ASLI

Bernama News | Berita Dalam Negeri | 04/11/2018 | Author: SUZIELA CHE MAT | Others

KUALA LUMPUR, 4 Nov (Bernama) – Kerajaan akan memastikan peruntukan RM100 juta yang dikhususkan untuk masyarakat Orang Asli dimanfaatkan bagi memenuhi keperluan pembangunan komuniti itu, khususnya bagi memperkasa pendidikan dalam kalangan mereka.

Menteri di Jabatan Perdana Menteri (Perpaduan Negara dan Kesejahteraan Sosial), Senator P. Waytha Moorthy berkata pendidikan menjadi antara aspek utama dalam usaha meningkat taraf sosio-ekonomi masyarakat minoriti itu.

Katanya, justeru, kerajaan akan membuat perancangan secara teliti supaya segala usaha yang telah dan akan dirangka berjaya direalisasikan.

"Jabatan Kemajuan Orang Asli Malaysia (JAKOA) diletakkan di bawah seliaan kementerian (portfolio) ini tiga minggu lepas. Kita mengambil langkah proaktif dan akan berbincang dengan semua pihak berkepentingan bagi memastikan keperluan masyarakat Orang Asli dipenuhi.

"Dan daripada perbincangan yang diperoleh, mereka (Orang Asli) kurang berminat menghantar anak-anak ke sekolah berasrama penuh (SBP) kerana mereka telah lama hidup di dalam suatu komuniti yang cukup rapat. Jadi kerajaan akan berusaha membawa pendidikan lebih dekat kepada mereka," katanya.

Waytha Moorthy mengulas Belanjawan 2019 yang dibentangkan Menteri Kewangan Lim Guan Eng dalam temu bual dengan Bernama di pejabatnya di Bangunan Perdana Putra, Putrajaya.

Selain itu, katanya faktor akses pengangkutan dan kemudahan jalan ke bandar serta jalan antara perkampungan Orang Asli juga menjadi keperluan penting untuk masyarakat itu yang harus ditambah baik.

"Kita dapati kemudahan jalan juga menjadi masalah utama kepada mereka untuk ke sekolah. Sekolah yang ada di kawasan mereka jauh. Selain itu, untuk mendapat peluang pekerjaan lebih baik juga memerlukan akses jalan yang elok," katanya.

Waytha Moorthy berkata beliau akan berkolaborasi dengan kementerian berkaitan membantu meningkatkan tahap ekonomi masyarakat Orang Asli dengan memberi lebih peluang kepada mereka menceburi bidang perniagaan dan pertanian.

-- BERNAMA

SCM HS HIS